

Mase Na Mokonji



MPATE OYO EBUNGI

Yesu alobaki na bango lisese oyo ete, Soko moto moko na bino ajali na bampate mokama, mpe moko na bango abungi, akotika bango ntuku libwa na libwa kati na lisobe, mpe akokenda koluka yango ebungi kino akojua ye yango te? Esili ye kojua yango akotia yango na mabeka na ye na kosepela, mpe akoingela ndako mpe akoyanganisa baninga na ye na bajalani na ye, mpe akoloba na bango ete, Sepelana na ngai, mpo ete najui mpate na ngai oyo esilaki kubunga. Nalobi na bino ete, bongo esengo ekojala kati na Likolo mpo na moto moko na masumu oyo akobongola motema, ekoleka esengo mpo na bayengebeni ntuku libwa na libwa baoyo bajali na bosenga na kobongola motema te.

MPATA OYO EBUNGI

Lisusu soko mwasi moko ajali na mbuma na palata jomi, soko mpe akobungisa mbuma moko, akokamata kobambola mwinda mpe kokomba ndako mpe kolukaluka kino ekojua ye yango te? Esili ye kojua yango, akoyanganisa baninga na bajalani na ye, mpe akoloba ete, Sepelana na ngai, mpo ete najui mbuma oyo ebungaki. Nalobi na bino ete esengo ekojala bongo kati na banje na Njambe mpo na moto moko na masumu oyo abongoli motema.

(Luka 15:3-10)

MWANA NA KILIKILI

Yesu alobaki mpe ete, Moto moko ajalaki la bana babali mibale. Oyo na nsima kati na bango alobaki na tata na ye ete, Tata, pesa ngai ndambo na biloko bikokitana na ngai. Akabweli bango biloko na ye. Na nsima na mikolo mingi te, mwana na nsima akangi biloko yonso, mpe akendaki na mokili mosusu mosika, mpe abebisi biloko na ye wana na kotambola kilikili. Wana esilisaki ye biloko na ye yonso, njala monene mpenja ebimi na mokili yango, ye mpe abandi kojanga. Bongo akendaki mpe ajuaki mosala epai na moto na mboka na mokili yango, mpe atindi ye kati na bilanga na ye koleisa ngulube. Ajalaki na mposa na kotondisa libumu na ye na mposi ijalaki ngulube kolia, mpe moto apesaki ye eloko te. Akanisaki na motema mpe alobi ete, Basali na lifuti na tata na ngai mingi bajali na kwanga eleki, nde ngai nakufi na njala awa. Nakolongwa mpe nakokenda epai na tata na ngai, mpe nakoloba na ye ete, Tata, nasaleli Likolo mabe, nasali mabe mpe na miso na yo, nabongi kobiangama mwana na yo lisusu te, jalisa ngai lokola moko na basali na yo na lifuti. Alongwi, mpe akomi epai na tata na ye mpenja. Nde naino ejalaki ye mosika, tata na ye amonaki ye mpe ayokeli ye mawa; atamboli mbango

mpe abumeli ye mpe apwepwi ye. Mwana na ye nde alobi na ye ete, Tata, nasaleli Likolo mabe, nasali mabe mpe na miso na yo, nabongi kobiangama mwana na yo lisusu te. Tata nde alobi na baombo na ye ete, Yaka na elamba eleki kitoko nokinoki kolatisa ye, mpe tia lopete na mosapi na ye, mpe sapato na makolo na ye, mpe yaka na mwana na ngombe na mafuta mpe boma yango, tolia, tosepela, mpo ete mwana na ngai oyo awa ajalaki mokufi mpe ajali na bomoi lisusu: ajalaki mobungani mpe ajuami. Babandi kosepela.

(Luka 15:11-24)

MOSAMALIA MALAMU

Yesu ajongisaki monoko ete, Moto moko ajalaki kokita na Yelusaleme kokenda na Yeliko. Akweaki kati na babotoli mpe bango balongolaki bilamba na ye, mpe babeti ye, mpe kokenda na bango batiki ye penepene na kufa. Likambo ebimi boye ete nganga moko ajalaki kokita na njela yango, mpe amonaki ye, mpe aleki na epai mosusu. Bobele bongo Molewi akomi na esika yango, mpe amonaki ye, mpe aleki na epai mosusu. Nde Mosamalia ajalaki kotambola mobembo, akutaki ye, mpe emonaki ye ayokelaki ye mawa mingi, mpe akendaki epai na ye mpe akangi mpota na ye mpe asopi mafuta na vinyo na kati na yango, mpe abutisi ye na mpunda na ye mpenja, mpe akei na ye na ndako na bato na mobembo, mpe abateli ye. Na mokolo na nsima abimisi denali mibale (denali moko ejali makuta ekoki kosomba biloko na kolia na mokolo moko), mpe apesi yango na mobateli na ndako, mpe alobi ete, Batela ye, mpe soko okosilisa mosolo mosusu boni, nakojongisela yo yango wana akojonga ngai awa. Na kati na bango misato okanisi nani ajalaki mojalani na oyo akweaki kati na babotoli? Ye alobaki ete, Oyo ayokelaki ye mawa. Yesu alobaki na ye ete, Kenda na yo kosala bobele bongo.

(Luka 10:30-37)

BASALI MABE NA ELANGA

Boyoka lisese mosusu. Mokolo na ndako akonaki elanga na miwiti mpe ajingeli yango na lopango mpe atimoli ekamwelo na vinyo kati na yango mpe atongi ndako molai mpe atiki yango epai na basali mpe akei na mokili mosusu. Ebelemi elaka na mbuma, atindi baombo na ye epai na basali ete bakamata mbuma ne ye. Nde basali basimbi baombo na ye mpe babeti moko mpe babomi mosusu mpe babwakeli mosusu mabanga. Lisusu atindi baombo mosusu koleka baoyo na liboso na motuya, mpe basaleli bango motindo moko. Nsima, atindi mwana na ye epai na bango, ye ete, Bakotosa mwana na ngai. Nde emoni basali mwana, balobani kati na

bango ete, Oyo ajali mosangoli na libula. Yaka, toboma ye mpe tojua libula na ye. Bakangi ye mpe babwaki ye libanda na elanga mpe babomi ye. Bongo, wana ekoya nkolo na elanga, akosalela basali yango nini? Balobi na ye ete, Akokufisa bato mabe yango kufa mabe mpenja mpe akopesa elanga na miwiti epai na basali mosusu baoyo bakopesaka ye mbuma na elaka na yango.

Yesu alobi na bango ete, Botangi naino kati na makomi te ete,

Libanga liboyaki batongi esili

kokoma moto na nsuka.

Likambo oyo esalami na Nkolo mpe

ejali eloko na kokamwa na miso na biso.

(Matai 21:33-42)

LISESE NA BASEKA JOMI

Bongo Bokonji na Likolo ejali lokola baseka jomi baoyo bakamataki miinda na bango mpe bakendaki kojuana na mobali na libala. Mitano na bango bajalaki bilema mpe mitano na mayele. Jambini bango bilema bakamati miinda na bango nde bakamati mafuta na bango elongo te. Nde bango na mayele bakamati mafuta kati na milangi esika moko na miinda na bango. Eumeli mobali na libala, bango yonso bayoki mpongi mpe balali. Kati na butu, mongongo eyokani ete, Tala mobali na libala, bobima mpo na kojuana na ye. Bongo baseka yango yonso balongwi na mpongi mpe babongisi miinda na bango. Bango bilema balobi na bango na mayele ete, Pesa biso ndambo na mafuta na bino, jambini miinda na biso ijali kojimana. Nde bango na mayele bajongisi liloba ete, Te, soko ete ekokoka mpo na biso mpe mpo na bino te. Bokenda epai na batekisi mpe bosomba mpo na bino mpenja. Ekei bango kosomba, mobali na libala ayei mpe bango babongi baingeli esika moko na ye kino libala mpe ekuke ekangami. Na nsima baseka mosusu bayei mpe balobi ete, Nkolo! Nkolo! jipwela biso! Nde ye ajongisi monoko ete, Najali koloba na bino solo ete, Nayebi bino te. Bongo bokengelaka mpo ete boyebi mokolo soko ntango te.

(Matai 25:1-13)

© C.E.R.S. - B.P. 1673 Kananga

République Démocratique Du Congo

Email: 33eme.cers.lit@gmail.com

<http://www.33eme-cers.org/>